

Date – 07/07/2025

Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- 1. Kumin January thla atanga June thla chhungin Mizoram district 11 zingah Kolasib-ah ruahtui a tla tam ber a, Lunglei district-ah a tla tlem ber thung.**
- 2. Adviser to CM (political) Pu Lalmuanpuia Punte chuan nimin khan zofa pawl pahnih inkapte inkara boruak tha zawk a awm theih dan tur kawng dapin Zokhawthar leh Myanmar a Khawmawi a tlawh.**
- 3. Brazil-a BRICS Summit neih mekah hruaitu kalkhawmte chuan April ni 22-a Jammu and Kahsmir-a firfiakte chetna chu na takin an dem**
- 4. Prime Minister Narendra chuan BRICS Summit vawi 17-na neih mekah firfiakte lakah hrekna na zawk lekkawh a tul thu a sawi.**

<><><>

RAINFALL

Kumin January thla atanga June thla chhungin Mizoram district 11 zingah Kolasib-ah ruahtui a tla tam ber a, Lunglei district-ah a tla tlem ber thung.

India Meteorological Department (IMD) in a chhinchhiah danin, kumin January thlaah Mizoramah ruahtui a tla lova, February thla atang khan Kolasib District leh Lengpui-ahte ruah tam vak lo a tla tan. June thla kha Mizoram hmun hrang hrangah ruahtui a tlak tam ber thla a ni a. Kumin January thla atanga June thla chhungin Mizoram district hrang hrang zingah Kolasib-ah ruah a tla tam ber a, hemi hun chhung hian ruah millimetre 1,289 point 6 a tla a, Lengpui in dawtin, ruah millimetre 1,086 point 4 a tla a, Siaha district-ah ruah millimetre 1,077 point 4, Aizawl district-ah ruah millimetre 1070 point 5, Champhai District-ah ruah millimetre 766, Mamit District-ah ruah millimetre 561 point 3, Lawngtlai District-ah ruah millimetre 515 point 6, Serchhip District-ah ruah millimetre 499, Lunglei District-ah chuan ruah millimetre 356 point 3 a tla a ni.

IMD, Aizawl Centre, Director, Pu Sudheer Kumar Dwivedi-a chuan Akashvani Regional Unit, Aizawl zawhna chhangin, kumin January thla atanga June thla inkara Mizorama ruahtui tla zat chu a lungawi thlak thawkhat a ti a, district thenkhatah chuan nikum nen khaikhhinin kuminah ruahtui a tla tha hle a, hetih rual hian Champhai District leh chhimlamah te chuan ruahtui a tla tlem thung a ti a, hmun hrang hranga ruahtui tla zat danglam chhan hi sik leh sa inthlak danglam, climate change in a nghawng vang niin a sawi a, nikum nen khaikhhinin kuminah chuan Mizorama ruahtui tla zat chu zaa 10 atanga 12 velin a pun a rin thu a sawi a bawka a ni.

Meteorological Centre Aizawl chuan tunkar Inrinni lo awm tur thleng khian Mizoram hmun hrang hrangah ruah sur turin a hmulawk bawk a ni.

<><><>

SOIL SAMPLE

Central Road Research Institute (CRRI) mithiamte chuan Aizawl-Thenzawl-Lunglei kawngpui a lei leh lung sample la-in an hmunpui lamah an thawn.

CRRI atang hian scientist 3 leh technician 2 an rawn kal a, June ni 26 khan Lunglei an thleng a. PWD engineer-te nen kawng an zir Chiang a. Kangmun South khua leh Pukpui inkar kawngpui hmun hrang hranga leilungte la-in Inrinni khan CRRI hmunpui-ah thawn a ni a. CRRI hmunpui-ah hian leilung sample an thawnte hi lo zir Chiangin tlo zawka he lai kawngpui hi siam a nih theih na'n ni 45 chhungin kawng siam dan tur rawtna an rawn siam ang a, chutiang chuan PWD-in kawng siamna atana senso zat tur an duang chhuak dawn a ni.

June ni 19 khan Aizawla Indian Road Congress (IRC) inkhawmpui hmang tura lokal IRC president Prof. Manoranjan Parida khan Council of Scientific and Industrial Research (CSIR) hnuai a awm CRRI mithiamte'n Mizoram kawng a tlo loh chhan an rawn zir Chian dawn thu a lo sawi tawh a. Kawngpui a tlo theihna atan chik taka Mizoram leilung zir Chian a ngaih thu leh zirChiang tur mithiam an rawn kal dawn thu a lo sawi tawh a ni.

<><><>

CHIN GROUPS CONFLICT

Chin ralthuam keng pawl pahnih inkah chungchangah palai hna thawkin Political Adviser to CM Pu Lalmuanpuia Punte chuan Champhai District Zokhawthar ah pawl 2 hruaitute nimin khan a kawm a,

Pu Lalmuanpuia hian CNDF leh CDF hotu a hmuh theih theih te biain inremna an neih theih nan Mizoram sawrkar lam atanga theihtawp chhuahpui an in huam thu leh nunau pawl sawi lo te thlabarna leh mangan na thlen lo turin a chah a ni . 14th Assam Rifles hotute pawh kawmin thil awmdan leh hmalak zel dan turte sawipuiin, Pu Lalmuanpuia Punte MLA hi SIB a officer te leh , DC , SP , SDO (sadar), MZP president leh ZPM Champhai south block hruaitu ten an tawiawm a ni.

Chin ralthuam keng pawl pahnih inkah Champhai district Zokhawthar a raltlan lutte chu mi 3,000 an chuang tawh a.

Champhai district Police hotute hnen atanga Akashvani Aizawl thu dawn danin Inrinni a Chinland Defense Force - Hualngoram leh Chin National Defense Force (CNDF) inkahna avang khan nimin thleng khan mi 2,845 chu sahimna zawngin Zokhawtharah an tlanchhia a. A hma, Nilaini atanga CDF-Hualngoram leh CNDF te an inkah hnu khan a mi 400 thelh raltlan an lo awm tawh bawk a. Raltlan tam ber hian an chhungte an bel a, belh tur neilo chu te chu Zokhawthar YMA Hall ah dah khawm an ni. He tih lai hian CDF-

Hualngoram sipaite inkulhna hmun zawng zawng, an hmunpui ber Tuichirh camp tiamin CNDF hian an laksak fai vek tawh a. CDF-Hualngoram awp chin zawng zawng pawh la vekin CNDF hian an awp fel tawh a, silai ri pawh nimin tlai atang khan a reh zui a. CDF-Hualngoram mipui sipaite chu an tlan darh vek tawh baw a, a then chu Mizoram lamah an lo lut a ni.

Hualngoram People's Organisation (HPO) hotu pakhatin phone hmanga Akashvani Aizawl a hrilh danin CNDF chauh ni lovin anmahni puitu Chin Brotherhood hnuai a pawl hrang hrang mi ralthuam kengte chuan an tam hneh tak avangin CDF-Hualngoram mipui sipaite chuan an camp-te an hum zo ta lo a. An tlan darh ta vek niin a sawi a. An mite zinga mi 5 an hliam thu sawiin, 4 hi Zokhawthar damdawi-ina enkawl an nih lai-in pakhat, a hmai a kah chu Champhai district hospital a enkawl a nih thu a sawi.

Nimin Chawhnu dar 1:00 p.m. vel khan Champhai district, East Tuipui biala Vaphai khaw ram, Saikhum phai piah lawka Leilet khawbula Chin National Defence Force (CNDF) te Camp pakhat, Camp Rihli tia an vuah chu Chin National Army (CNA) ten beiin an thuhnuaiah an dah vethung a. Tun hnaia CNDF-Falam mi ten CDF-Hualngo mite Camp hrang hrang an beih vanga chhanletna chi khat niin thu dawnna in a tarlang.

Vaphai YMA hruaitute hnen atanga thu dawn danin, ralthuam keng pawl pahnihte inbeihna avang hian Tiau lui hnai vaia Myanmar rama khaw pathum- Leilet, Selawn leh Satawm atangin mipui hlauthawng ten sahimna zawngin Mizoram lamah rawn tlan lut a, Vaphai YMA ten Saikhumphai khuaah lo dawngsawngin Vaphai khuaah hruai chhoh zel an ni a, nizan thleng khan raltlan te hi mi 620 an tling tawh a. Puitling 460 vel leh naupang 160 vel an ni a,

Raltlan thleng thar apiangte chaw lo pek zel an ni a, khawtlang mipuiin a then mikhualin, an mutbu tur thawh khawm a ni a, Vaphai comunity hall-raltlan nawlpui chu riah tir an ni.

Hetihlai hian Myanmar atanga raltlan zingah mi 3 te Tiau lui tui lianah nimin chawhnu khan chesual in tuiah an tlahlum a, Vaphai, Chawngtui leh Farkawn atangin mi tlawmngai ten ruang zawn hna hi an thawk mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BRICS

Brazil-a BRICS Summit neih mekah hruaitu kalkhawmte chuan April ni 22-a Jammu and Kahsmir-a firfiakte chetna chu na takin an dem.

Rio de Jeneiro khawpuia BRICS hruaitu kalkhawmte chuan an thupuanah mi 26 an thihna he firfiaka chetna hi an dem thu leh firfiaka chetna chu engti kawng pawh nisela do zel an tum thu an sawi nawn a. Ramri kana firfiaka chetnate, firfiakte suma puihna leh mahni ramchhunga lo humte pawh an dem takzet tih an sawi a ni.

<><><>

PM

Prime Minister Narendra chuan BRICS Summit vawi 17-na neih mekah firfiakte lakah hrekna na zawk lekkawh a tul thu a sawi. Pu Modia chuan firfiakte leh an pawikhawihna tuartute chu buk lung khata khai chi an ni lo tih a sawi a. Tunlai khawvela mihringte himna ti derthawngtu lian ber chu firfiaka chetna anih thu a sawi a. April ni 22 a Pahalgama firfiakte chetna chu India zahawmna leh a chhungril na taka beihna anih thu a sawi a ni.

<><><>